

Parlament Federacije Bosne i Hercegovine

Vlada Federacije Bosne i Hercegovine

Federalno ministarstvo energije, rudarstva i industrije

Federalno ministarstvo razvoja, poduzetništva i obrta

Federalna regulatorna komisija za energiju (FERK)

"BH-Gas" d.o.o. Sarajevo

Vlada Zeničko-dobojskog kantona

Predmet: INICIJATIVA „DA PLIN DOĐE DO SVAKE FABRIKE U ZENIČKO-DOBOJSKOM KANTONU“, upućuje se

Poštovani,

INICIJATIVA:

Ministarstvo za privredu Zeničko-dobojskog kantona i Privredna komora Zeničko-dobojskog kantona zajednički pokreću Inicijativu: „DA PLIN DOĐE DO SVAKE FABRIKE U ZENIČKO-DOBOJSKOM KANTONU“.

Inicijativa ima strateški značaj za dalji ekonomski razvoj, povećanje konkurentnosti privrede, poboljšanje životnog standarda građana i zaštitu okoliša korištenjem ekološki prihvatljivog energenta. Zajednički stav Ministarstva za privredu ZDK i Privredne komore ZDK jeste da plin nije alternativa, već rješenje i prioritet za industriju i privredu općenito, a naročito za proizvodno i izvozno orijentisane kompanije.

Obrazloženje:

Južna interkonekcija je planirani gasovod koji treba povezati Bosnu i Hercegovinu sa tržištem plina u Hrvatskoj i Evropskoj Uniji. Planirani gasovod će omogućiti da Bosna i Hercegovina dobije novi, alternativni pravac snabdijevanja prirodnim plinom, nezavisan od postojećeg pravca. Na ovaj način, povećava se energetska sigurnost, a smanjuje zavisnost od jednog snabdjevača. Gasifikacija novih područja, uključujući i Zeničko-dobojski kanton, povećava konkurentnost i omogućava dugoročnu stabilnost snabdijevanja. Projekt je usklađen s EU energetsom politikom i Energetskom zajednicom, te se isti smatra strateškim infrastrukturnim projektom.

Zeničko-dobojski kanton je jedna od najvažnijih industrijskih regija u Bosni i Hercegovini: Indikatori privrednih kretanja i vanjskotrgovinske razmjene, zatim brojne fabrike, preduzeća i rastuće industrijske zone su jasni dokazi za to. Međutim, nedostatak priključka na gasovodnu infrastrukturu ograničava privredni rast, povećava troškove proizvodnje zbog skupljih alternativnih izvora energije, te smanjuje atraktivnost kantona za nove investicije.

Privreda Zeničko-dobojskog kantona je proizvodno i izvozno orijentisana, zbog čega bi fabrike, industrijske zone, ali i domaćinstva sa područja Zeničko-dobojskog kantona imali velike benefite ukoliko ova Inicijativa bude prihvaćena od strane relevantnih donosilaca odluka.

Smatramo da gasifikacija Zeničko-dobojskog kantona ne podrazumijeva ogromna ulaganja, jer trenutna gasovodna mreža već obuhvata Visoko, Kakanj i Zenicu. Sa druge strane, postoji interes ozbiljnih industrijskih potrošača, kao i šireg građanstva da se izvrši gasifikacija slijedećih općina i gradova: Žepče, Zavidovići, Maglaj, Doboj Jug, Usora i Tešanj.

Dostupnost plina omogućava:

1. Smanjenje troškova poslovanja – plin je jeftiniji i efikasniji energent u odnosu na ugalj, električnu energiju, naftu ili lož ulje;
2. Povećanje konkurentnosti – privlačenje novih investitora i očuvanje postojećih i otvaranje novih radnih mjesta;
3. Zaštitu okoliša – smanjenje emisija štetnih gasova i čestica;
4. Poboljšanje kvaliteta života – mogućnost priključka domaćinstava na plin za grijanje itd.

Ciljevi projekta:

- Izgradnja osnovne gasovodne mreže koja će povezati sve jedinice lokalne samouprave sa područja ZDK;
- Priključak postojećih i planiranih industrijskih zona na gasovod;
- Omogućavanje priključka za javne ustanove, škole, bolnice i stambene objekte;
- Stvaranje preduslova za korištenje plina u transportu i drugim sektorima.

Predložene aktivnosti:

1. Izrada studije izvodljivosti i projektne dokumentacije;
2. Uključivanje relevantnih domaćih institucija: Vlade FBiH, preduzeće BH-Gas, Vlade ZDK (u okviru svojih nadležnosti);
3. Osiguravanje finansijskih sredstava kroz kombinaciju izvora (kantonalni budžet, državni fondovi, međunarodni izvori, privatno-javno partnerstvo, itd.);
4. Provjeru mogućnosti korištenja sredstava iz fondova za regionalni razvoj i Zelene agende za EU;
5. Uključivanje relevantnih međunarodnih finansijskih institucija: EBRD, Svjetska banka, itd.

Zaključak:

Ministarstvo za privredu ZDK i Privredna komora ZDK dijele zajedničku viziju prema kojoj je neophodno planirani gasovod iskoristiti kao dodatni motor razvoja privrede Zeničko-dobojskog kantona, entiteta i države, na način da se na taj gasovod priključi cjelokupan ZDK, kako bi svaka fabrika u ZDK mogla da koristi plin, kao energent za svoje nesmetano poslovanje.

Izgradnja gasovoda kroz Zeničko-dobojski kanton neophodna je za održivi privredni razvoj i unapređenje kvaliteta života. Pozivamo sve relevantne institucije da podrže Inicijativu „DA PLIN DOĐE DO SVAKE FABRIKE U ZENIČKO-DOBOJSKOM KANTONU“ i zajedničkim snagama omoguće njeno brzo sprovođenje.

S poštovanjem,

Ministarstvo za privredu/gospodarstvo
Zeničko-dobojskog kantona



Privredna komora
Zeničko-dobojskog kantona

